

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 257367 25 St
Zenica, 10.12.2025. godine

Općinski sud u Zenici, sutkinja Marina Šapina, u stečajnom postupku nad društvom Društvo za proizvodnju, trgovinu i usluge AN Tango d.o.o. Zenica, ul. Londža broj 88, Zenica, zastupano po punomoćniku Tarik Hadžimahmutović, odvjetnik iz Zenice, odlučujući o prijedlogu privremenog stečajnog upravnika Begagić Jasmina iz Zenice, nakon ročišta održanog dana 03.07.2025. godine, u prisustvu privremenog stečajnog upravitelja i punomoćnika predlagatelja, van ročišta dana 10.12.2025. godine, donio je sljedeće:

R J E Š E N J E

Otvara se i zaključuje stečajni postupak nad društvom Društvo za proizvodnju, trgovinu i usluge AN Tango d.o.o. Zenica, ul. Londža broj 88, Zenica, MBS: 43-01-0598-16, zbog nepostojanja stečajne mase, te se nalaže brisanje ovog privrednog subjekta iz sudskog registra zavedenog u reg. ul. broj: 43-01-0598-16, a po pravomoćnosti ovoga rješenja.

O b r a z l o ž e n j e

Prijedlogom od 26.02.2025.godine, Društvo za proizvodnju, trgovinu i usluge AN Tango d.o.o. Zenica, ul. Londža broj 88, Zenica, zastupano po punomoćniku Tarik Hadžimahmutović, odvjetnik iz Zenice, pokrenut je stečajni postupak nad navedenim društvom.

Rješenjem ovoga suda br. : 43 0 St 257367 25 St od 04.04.2025. godine, pokrenut je prethodni postupak radi utvrđivanja uslova za otvaranje stečajnog postupka nad imovinom stečajnog dužnika Društvo za proizvodnju, trgovinu i usluge AN Tango d.o.o. Zenica, ulica Londža broj 88, Zenica, MBS: 43-01-0598-16i za privremenog stečajnog upravnika imenovan je Begagić Jasmin iz Zenice, Londža 92.

Na ročištu za ispitivanje uvjeta za otvaranje stečaja održanom dana 03.07.2025. godine, privremeni stečajni upravitelj je izjavio da ostaje kod svog izvještaja od 09.05.2025. godine. Dalje navodi da je uvidom u dokumentaciju stečajnog dužnika u toku prethodnog postupka utvrdio obaveze istog i to u odnosu na Poreznu upravu, prema stanju od 26.05.2025. godine u iznosu od 35.437,89 KM po osnovu javnih prihoda, zatim u odnosu na pravno lice Alba d.o.o. Zenica iznos od 2.226,98 KM, te u odnosu na JU Institut za zadržavanje hrane Zenica iznos od 660,00 KM, što ukupno iznosi 38.324,87 KM. U odnosu na imovinu stečajnog dužnika uvidom u Uvjerjenje ZK ureda Općinskog suda u Zenici i Uvjerjenje Službe za imovinsko-pravne, geodetske poslove i katastar nekretnina Grada Zenica te poslovnu dokumentaciju stečajnog dužnika utvrđeno je da isti nema niti u vlasništvu niti u posjedu svojih nekretnina. U odnosu na drugu imovinu, uvidom u poslovne knjige, Rješenje MUP-a ZDK, te uvidom u poslovne prostorije utvrđeno je da stečajni dužnik ne posjeduje pokretne stvari niti bilo kakvu drugu imovinu. Stečajni dužnik nema niti druge imovine niti potraživanja. Uvidom u Izvještaj o računima poslovnog subjekta dostavljen od Centralne banke utvrđeno je da stečajni dužnik ima otvoren jedan transakcijski račun kod

UniCredit Banke, te da je isti blokiran od 07.09.2020. godine. U odnosu na posljednje izrađeni Bilans stanja na dan 31.12.2023. godine pod stavkom Kratkoročna imovina vodi se u stavci 1.4. roba u iznosu od 1.429,00 KM, te se ista odnosi na robu koja nije rasknjižena, ista se ne nalazi u posjedu dužnika niti je ista pronađena na adresi sjedišta. Pod stavkom 9. Kratkoročne imovine, a koja se odnosi na novac i novčani ekvivalent vodi se iznos od 8.673,00 KM isti se odnosi na imovinu koja je trebala biti isknjižena uzimajući u obzir stanje računa, odnosno blokadu istog preko 5 godina. Slijedom navedenog, te činjenica da već dugi niz godina stečajni dužnik ne posluje niti ostvaruje prihode, da mu je račun blokiran 5 godina prije prijedloga za pokretanje stečajnog postupka, privremeni stečajni upravitelj izjavljuje da smatra da stečaj nije pokrenut u roku od 60 dana od dana nastupanja platežne nesposobnosti, da postoji razlog za otvaranje stečajnog postupka, a to je platežna nesposobnost stečajnog dužnika, da ne postoji imovina u bilo kojem obliku da se pokriju niti djelimično troškovi otvaranje i vođenja stečajnog postupka koji bi po procjeni privremenog stečajnog upravitelja iznosili 5.000,00 KM, te predlaže sudu da postupi u skladu sa odredbom člana 102., stav. 7 Zakona o stečaju FBiH, i pozove povjerioce i zainteresirana lica da u roku od 30 dana predjume naprijed navedeni iznos i predlože otvaranje stečajnog postupka i predjume iznos od 5.000,00 KM na ime troškova stečajnog postupka, te da ukoliko niko u ostavljenom roku ne predjumi određeni iznos, donese rješenje o otvaranju i zaključenju stečajnog postupka nad navedenim društvom kao i da po pravomoćnosti istog briše društvo iz sudskog registra.

Punomoćnik predlagatelja izjavljuje da predlagatelj ostaje kod prijedloga za otvaranje stečaja, da nema primjedbi ni pitanja na izvještaj privremenog stečajnog upravitelja, te da je suglasan sa prijedlogom privremenog stečajnog upravitelja.

Rješenjem 03.07.2025. godine. Godine, sud je pozvao povjerioce i zainteresirana lica da u roku od 30 dana od dana objavljivanja poziva predlože otvaranje postupka i uplate predjuma za obezbjeđenje troškova stečajnog postupka u iznosu od 5.000,00 KM, na depozitni račun ovoga suda.

Rješenje ovoga suda od 03.07.2025. godine, objavljeno je na oglasnoj ploči suda dana 04.07.2025. godine, na web stranici suda i u „Službenim novinama Federacije BiH“ broj: 55/25 od 23.07.2025.godine.

Kako stečajni dužnik ima obaveze, dok nema imovine, pa ni za namirenje troškova stečajnog postupka, a povjerioci i zainteresirana lica u roku ostavljenom u rješenju donesenom od strane ovoga suda nisu predložili otvaranje stečajnog postupka niti predjumili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečaju, odlučeno kao u izreci ovog rješenja.

Sukladno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje usljed nedostatka mase prestaje postojati, te brisanje ovog pravnog lica iz sudskog registra.

Sutkinja:

POUKA O PRAVNOM LIJEKU

Protiv ovog rješenja može se izjaviti žalba
Kantonalmom sudu u Zenici u roku od 8 dana
od dana prijema, putem ovog suda. Žalba se dostavlja u
dovoljnom broju primjeraka za sud i protivnu stranku.

Marina Šapina, v.r.